

auch ein Instrument / darinnen man den Salpeter probieren könte / verzeichnet were / Sintemahlen / wie meniglichen bewust ist / man in Einkaufung des Salpeters oft grösslich hinder das Viecht geführt wird.

Capo.

Euch wird gnugsam bewust sein / wie die allgemeine Salpeter Probierung geschihet / massen dann in gedachtem Buch der Halinitro Pyrobolia, vnd am dritten Blatt desselbigen hiervon ausführliche Andeutung beschehen / Nemblich das man ein Häufflin (vnd etwann sovil als in ein halbe Nennenanschalen gefüllt mag werden) des Salpeters auff ein Brettlin thut setzen / darauff wirdt alsdann ein glühender Kolen gelegt / welcher den Salpeter endzündet / Wann er nun mit starkem Rauchen / hellen blawen Flammen (ohne von sich spritzendem Vnrath / oder dicken Dampff) vnd endlich tieff vnter sich in das Brettlin hinein brinnet / so ist er gut : im widrigen aber / wann er dicken Rauch / dunkel rot Fehr / viel Vnrath vmb vnd neben ihme hinderlasset / auch nicht tieff in das Brettlin brint / so ist er schlecht : der muß alsdann fermer gepurgiert werden.

Büchsenmaister.

Das weiß ich zuvor alles wol / vnd habe es von jugent auff auch also erlernet / vnd in vilen andern Ländern gesehen / Mich bedunckt aber / diese Proba geschehe nit mit rechtem Fundament : daher der effect das eine mal nicht wie das ander sich erzeigt / Also kan man auch nichts gewisses darauff schliessen / in bedenkung / vnd Erstlich / da man dessen Salpeters nimbt / so in stengel geläutert (vnd wie Crystall ein ansehen hat / dar von vnd wie solcher zubereitet soll werden / das ist in offternanter Halinitro Pyrobolia am. 4. Blatt ausführlich beschriben worden /) vnd ein Häufflin auff ein Brett setzt / darunter sich aber groß vnd kleine Stücklin befinden / die alsdann im endzünden vnd nach dem als sie ligen / vnterschiedlichen effectum machen / daher so kan man durch solche Vnordnung kein Maß oder Gefäß nie nit gewiß / oder das einmal wie das ander / darmit einfüllen. Zum Andern so mag gar leichtlich das Häufflin Salpeter das erste mal höher oder breitter / dan das ander auffgesetzt werden / vnd ob schon der glühende kolen (da ist abermahlen ein grosser Vnterschied : dan wie leichtlich zuerachten / so wird der von Buchenholz ein sterckern brand / als der von Tannenbäumen Holz gebrendte Kolen / in sich haben / darauff dann fürnemblich achtung zu geben ist) in mitten / vnd also auff

D ij den

Grosse vngelogenheiten so sich im probieren des salpeters begeben